

Svjetski dan zaštite životne sredine BiH je dočekala raznim ekološkim akcijama, ali i upozorenjima ekologa da je naša jedna od najzagađenijih zemalja u Evropi, a da bi se takva slika promijenila potrebno je mijenjati svijest građana i njihovo ophođenje prema prirodi. Jasmin Pašić, iz Centra za životnu sredinu Banjaluka, kaže da je u januaru ove godine rađeno istraživanje Univerziteta "Yale" i "Columbia" o odnosu pojedinih država prema životnoj sredini. Od 180 ispitanih zemalja, BiH je zauzela 158. mjesto.

"Kompletno područje države je ugroženo, a posebno zaštićena prirodna područja, koja su ugrožena pretjeranom eksploatacijom resursa u korist privatnih kompanija i nereagovanjem nadležnih koji bi trebalo ta područja da štite", rekao je Pašić.

Srebrenka Golić, ministar za prostorno uređenje, građevinarstvo i ekologiju RS, rekla je da je Svjetski dan zaštite životne sredine, koji se obilježava u cijelom svijetu, uspostavljen od strane Ujedinjenih nacija 1974. godine.

"Bitno je da se svijest ljudi u tom segmentu mijenja kako bi životnu sredinu učinili onakvom kakva treba da bude, kada je u pitanju i zaštita zdravlja ljudi i kada je u pitanju zaštita prirodnih resursa u RS", rekla je Golićeva.

Mensura Susić, direktorica Udruženja za unapređenje životne sredine "E grupa" Zenica, kaže da se zalažu za podizanje svijesti građana, posebno kod mladih ljudi.

"U Zenici imamo najveći problem zraka, jer pojedine fabrike uništavaju vazduh, ali pored njih tokom zime imamo kućna ložišta i ljudi ne paze šta lože, a jedan od razloga zagađenja su i izduvni plinovi iz automobila", kaže Susićeva.

Dodaje da je prevashodno takav problem u Zenici, ali da je slično i u ostalim gradovima FBiH.

"BiH je među najzagađenijima u Evropi, a Lukavac i Zenica su najzagađeniji tokom zime u BiH. Tom problemu bi trebalo da se zajednički posvetimo, ono što trebamo je više zelenila, jer ipak te fabrike zapošljavaju naše ljude", rekla je Susićeva.

Jovica Sjeničić, predsjednik Društva za istraživanje i zaštitu biodiverziteta iz Banjaluke, kaže da zagađenje rijeka Spreče i Bosne najbolje ilustruje ophođenje prema rijekama u BiH.

Gradska uprava Trebinje je u saradnji s JU "Ekologija i bezbjednost" i Komunalnim preduzećem organizovala uličnu trku u kojoj se takmičilo oko 60 učenika osnovnih škola, zatim je organizovana sadnja drveća u gradu, a mališani iz gradskih vrtića su crtali u Dučićevoj ulici na temu ekologije, da bi ih na kraju trebinjski glumci amateri nagradili predstavom o ekologiji.

Uz moto "Pobijedimo zagađenje plastikom" u TK je obilježen Svjetski dan okoliša.

Najzagađenija mjesta divljim deponijama u Tuzli su Ilinčica, Kiseljak i posebno je zagađeno naselje Ravna Trešnja, udaljeno dva kilometra od Tuzle.



Ekolozi upozoravaju da je BiH jedna od najzagađenijih zemalja u Evropi

Kada bi građani bili kažnjavani, ne bi bacali tako otpad, smatra Džemila Agić iz Centra za ekologiju i energiju Tuzla.

Izvor: energetika.ba